

যক্ষা কি?

যক্ষা (টিবি) একটি ব্যাকটেরিয়াঘটিত সংক্রমণ, যা অধিকাংশ ক্ষেত্রে ফুসফুসে পাওয়া যায় কিন্তু এটি দেহের যে কোনো অংশকে আক্রান্ত করতে পারে। একে বলা হয় সক্রিয় যক্ষা। কমপক্ষে ছয়মাস ধরে ঔষধের একটি কোর্স সম্পন্ন করার মাধ্যমে সক্রিয় যক্ষা নিরাময় করা যায়।

শুধুমাত্র ফুসফুস বা গলার যক্ষা সংক্রমণ ছড়াতে পারে এবং অধিকাংশ মানুষ ঔষধ গ্রহণ শুরু করার দুই সপ্তাহের মধ্যেই আর সংক্রামক থাকেন না।

এছাড়াও সুপ্ত যক্ষা, বা যক্ষার সুপ্ত সংক্রমণ থাকা সম্ভব। এর অর্থ হচ্ছে আপনার দেহের ভিতরে জীবাণু রয়েছে কিন্তু আপনার দেহ সেগুলোকে নিয়ন্ত্রণের মধ্যে রাখছে এবং আপনাকে অসুস্থ হতে দিচ্ছে না। যাদের সুপ্ত যক্ষা রয়েছে তাদের দেহে কোনো লক্ষণ দেখা যায় না এবং তারা অন্যদের মধ্যে সংক্রমণ ছড়াতে পারে না।

কীভাবে যক্ষা হয়?

ফুসফুস বা গলার যক্ষায় আক্রান্ত কেউ কাশি বা হাঁচি দিলে, জীবাণুগুলো বাতাসে ক্ষুদ্র বিন্দুর আকারে ছড়িয়ে পড়তে পারে এবং অন্যরা সেগুলো নিঃশ্বাসের সাথে টেনে নিতে পারে। সেই সব ব্যক্তিদের যক্ষায় আক্রান্ত হওয়ার সম্ভাবনা বেশি থাকে যারা যক্ষা রোগীর সাথে দীর্ঘ সময় অতিবাহিত করেন (সাধারণত স্বামী/স্ত্রী এবং একই বাড়িতে বসবাসকারী অন্য ব্যক্তির, অথবা কদাচিৎ ঘনিষ্ঠ সহকর্মীর)। গুতু ফেলা বা কোনো সামগ্রী ভাগাভাগি করে ব্যবহার করার মাধ্যমে যক্ষা ছড়ায় না।

যক্ষার লক্ষণগুলো কী কী?

ফুসফুসে যক্ষার সবচেয়ে সাধারণ লক্ষণগুলো হচ্ছেঃ

- ক) কাশি তিন সপ্তাহের বেশি সময়ও ভালো না হওয়া। এটি একটি শব্দক বিরক্তিকর কাশি হিসেবে শুরু হতে পারে, যা হয়তো বুকের যে কোনো সংক্রমণ থেকে পৃথক কিছু বলে মনে হবে না। যক্ষার কাশি কয়েক সপ্তাহ বা কয়েক মাস ধরে অব্যাহত থাকবে এবং ক্রমাগত খারাপের দিকে যাবে।
- খ) সুপ্ত কোনো কারণ ছাড়া ওজন কমে যাওয়া।
- গ) জ্বর ও রাতে খুব ঘাম হওয়া। এই রোগের কারণে যে জ্বর আসে তা সাধারণত বেশিরভাগ ক্ষেত্রে রাতে আসে যার ফলে রোগীর মাত্রাতিরিক্ত ঘাম হয়, এত বেশি পরিমাণে যে মাঝরাতে হয়তো বিছানার সব চাদর বদলানোর প্রয়োজন হতে পারে।
- ঘ) ক্লান্তি ও অসুস্থতার একটি সাধারণ ও অস্বাভাবিক অনুভূতি।
- ঙ) ক্ষুধা কমে যাওয়া। এই সবগুলো লক্ষণ আবার অন্য কোনো সমস্যারও লক্ষণ হতে পারে।

আমার যক্ষা আছে কিনা তা আমি কীভাবে জানবো?

যদি এই লক্ষণগুলোর মধ্যে আপনার তিন বা তারচেয়ে বেশি লক্ষণ থাকে, তাহলে আপনার উচিত হবে আপনার জিপি-র সাথে দেখা করা (যদিও এর যে কোনোটি অন্য কোনো রোগ নির্দেশ করতে পারে যা আপনার জিপি-র সাথে পরীক্ষা করা উচিত)। যদি তারা মনে করেন যে যক্ষা হওয়ার সম্ভাবনা রয়েছে, তাহলে তারা আপনাকে স্থানীয় বক্ষ বা যক্ষা ক্লিনিকে রেফার করবেন, যেখানে পরীক্ষা সম্পন্ন করা হবে।

যদি আপনি এমন কাউকে চিনেন যার সংক্রামক যক্ষা রয়েছে, তাহলে ডাক্তাররা সেই ব্যক্তিকে জিজ্ঞাসা করতে পারেন যে তিনি কাদের সাথে দীর্ঘ সময় কাটিয়েছেন। তারপর হেলথ সার্ভিসেস যাদেরকে আক্রান্ত হওয়ার ঝুঁকির মধ্যে রয়েছে বলে বিবেচনা করবে তাদের সবার সাথে যোগাযোগ করবে এবং তাদেরকে পরীক্ষা করার জন্য আসতে অনুরোধ জানাবে।

বিভিন্ন ধরনের পরীক্ষাগুলো হচ্ছেঃ

স্কিন টেস্ট বা ত্বক পরীক্ষা (ম্যানটস্ক)

ত্বক পরীক্ষা নির্দেশ করে যে আপনার দেহ আগে কখনো যক্ষার জীবাণুর সংস্পর্শে এসেছে কিনা। আপনি বিসিজি টিকা নেয়ার মাধ্যমে (যাতে জীবাণুটির একটি নিরূপদ রূপ থাকে), অথবা নিঃশ্বাসের মাধ্যমে যক্ষার জীবাণু গ্রহণের মাধ্যমে সংস্পর্শে আসতে পারেন। একে বলা হয় ম্যানটস্ক টেস্ট এবং এতে টিউবারকুলিন নামক সামান্য পরিমাণ তরল পদার্থ আপনার ত্বকের একেবারে উপরের স্তরের মধ্যে একটি ছোট সুঁই ও সিরিঞ্জের মাধ্যমে সরাসরি ইনজেক্ট করা হবে। এতে সুঁই ফোটানোর জন্য সামান্য ব্যথা হতে পারে, কিন্তু দীর্ঘ সময়ের জন্য ব্যথা হবে না। ২-৩ দিন পর পরীক্ষার স্থানটি মূল্যায়ন করা হয়।

যদি টেস্টটি পজেটিভ হয়, তাহলে স্থানটি লাল হয়ে ফুলে যাবে। আপনি স্থানটি প্লাস্টার দিয়ে ঢাকা, এটিকে চুলকানো বা ঘষা, অথবা ওই স্থানে কোনো তেল, ক্রিম বা প্রসাধনী ব্যবহার করা উচিত হবে না। আপনি স্থানটিকে স্বাভাবিকভাবে সাবান ও পানি দিয়ে ধুতে পারেন। আকার ও লাল হওয়ার ভিন্ন ভিন্ন গ্রেড রয়েছে। ক্লিনিকের ডাক্তার বা নার্স ওই স্থানটি পরীক্ষা করবেন এবং পরীক্ষার ফলাফল আপনার কাছে বাখ্যা করবেন।

একটি পজেটিভ স্কিন টেস্ট বলতে কী বোঝায়?

একটি পজেটিভ স্কিন টেস্ট বা ত্বক পরীক্ষা বলতে অনেক কিছু বোঝাতে পারেঃ আপনি বিসিজি টিকা নিয়েছিলেন। যদি আপনি নিয়ে থাকেন, তাহলে একটি ছোট প্রতিক্রিয়া দেখার আশা করা হয় এবং এটি স্বাভাবিক। আপনার সুপ্ত যক্ষা থাকতে পারে। সুপ্ত সংক্রমণ নিশ্চিত করার জন্য আপনাকে রক্ত পরীক্ষা করতে বলা হতে পারে। আপনার সক্রিয় যক্ষা থাকতে পারে এবং আরো পরীক্ষা করার জন্য আপনাকে একজন ডাক্তার দেখাতে হবে।

একটি নেগেটিভ স্কিন টেস্ট বলতে কী বোঝায়?

এর অর্থ হচ্ছে আপনি হয়তো আগে কখনো যক্ষার জীবাণুর সংস্পর্শে আসেননি। কিন্তু এর অর্থ এটাও হতে পারে যে আপনাকে সময়ের আগেই পরীক্ষা করা হয়েছে অথবা আপনার শরীর পরীক্ষার প্রতি প্রতিক্রিয়া দেখাতে সক্ষম নয়।

এই পরীক্ষাটি ৬ সপ্তাহ পর আবার করার প্রয়োজন হতে পারে। নেগেটিভ ফলাফল সব সময় এটি বোঝায় না যে আপনার যক্ষা নেই।

যদি আপনার যক্ষা না থাকে কিন্তু আপনি যেখানে বসবাস করেন অথবা যেখানে কাজ করেন তার উপর ভিত্তি করে যদি অধিকাংশ মানুষের তুলনায় আপনার যক্ষায় আক্রান্ত হওয়ার সম্ভাবনা বেশি থাকে, তাহলে আপনাকে বিসিজি টিকা নেয়ার প্রস্তাব দেয়া হতে পারে। যদি আপনার শরীরের রোগ প্রতিরোধ ব্যবস্থা খুব দুর্বল হয় (যেমন এইচআইভি আক্রান্ত বা অঙ্গ-সংযোজিত রোগী) তাহলে আপনাকে বিসিজি টিকা গ্রহণের প্রস্তাব দেয়া হবে না, কারণ এই সকল ক্ষেত্রে জীবন্ত টিকার ঝুঁকি খুব বেশি থাকে।

রক্ত পরীক্ষা

যক্ষার জন্য একটি বিশেষ রক্ত পরীক্ষা রয়েছে। যদি আপনার স্কিন টেস্ট পজেটিভ হয় এবং আপনি সংক্রামক যক্ষায় আক্রান্ত কারো সংস্পর্শে থাকেন (কিন্তু আপনার কোনো লক্ষণ না থাকে), তাহলে আপনার সুপ্ত যক্ষা আছে কিনা তা পরীক্ষা করার জন্য আপনাকে এই পরীক্ষাটি করার জন্য বলা হতে পারে। যদি রক্ত পরীক্ষার ফলাফল পজেটিভ হয়, তাহলে আপনার সক্রিয় যক্ষা নেই তা পরীক্ষা করার জন্য আপনাকে আরো পরীক্ষা দেয়া হতে পারে।

৩৫ বছরের কম বয়সী যে সব ব্যক্তির সুপ্ত যক্ষা আছে তাদের তিন বা ছয় মাস মেয়াদী একটি চিকিৎসা কোর্স প্রদান করা হতে পারে। যাদের বয়স ৩৫ বছরের বেশি এবং এইচআইভি-তে আক্রান্ত নন তাদেরকে চিকিৎসা প্রদান করা হবে না কারণ যক্ষা-বিরোধী ঔষধের কারণে যকৃৎ নষ্ট হয়ে যাওয়ার ঝুঁকি বেশি থাকে। এইচআইভি-তে আক্রান্তদেরকে সবসময়ই চিকিৎসা প্রদান করা হয়, তাদের বয়স যাই হোক না কেন, কারণ তাদের সুপ্ত যক্ষা আরো সহজে সক্রিয় হতে পারে এবং তারপর এইচআইভি রোগকে বাড়িয়ে তুলবে।

বুকের এক্স-রে

যদি আপনার যক্ষার লক্ষণ থাকে, তাহলে আপনাকে বুকের এক্স-রে করার জন্য পাঠানো হবে। এটি ডাক্তারদেরকে দেখাবে যে আপনার ফুসফুসে যক্ষা আছে কিনা অথবা কখনো ছিল কিনা।